

Janaab Yusuf Kā Kḥwaab

Injeel : Mattā 1:18-25

Is tarah Maseeh Īsā^(a.s) kī paidaish huī. Īsā^(a.s) kī maañ kā naam beebī Maryam thā. Unkī shaadī janaab Yusuf se tay huī thī, lekin isse pahale wo ek dusre ke qareeb āte, beebī Maryam Allaah taa'alā kī qudrat se haamilā hueñ.⁽¹⁸⁾ Beebī Maryam ke hone waale shauhar, janaab Yusuf, ek acche ādmī the. Wo naheen chaahte the ki beebī Maryam logoñ ke saamne beizzat hoñ. To unhone beebī Maryam ko chupke se kaheen dur bhejne kā faisla kiyā.⁽¹⁹⁾

Jab wo ye sab karne ke baare me soch rahe the to Allaah taa'alā kī taraf se ek farishtā unke kḥwaab me āyā aur kahā, “Janaab Yusuf, Daaud kī aulaad, beebī Maryam ko apnī beewī banaane se mat ghabraao. Unke pet me jo bacchā hai wo Allaah taa'alā kī qudrat se hai.”⁽²⁰⁾ Wo ek laḍke ko paidā kareñgī aur tum uskā naam Īsā rakhnā. Is naam kā matlab hai ‘Bachaane waalā.’ Tum uskā yahī naam rakhnā kyunki wo apne logoñ ko gunaahon se bachaaegā.”⁽²¹⁾

Ye sab islie huā kyunki Allaah taa'alā ne apne nabiyon se ye kahā thā:⁽²²⁾ “Dekho, kuñwaarī laḍkī haamilā hogī aur wo ek laḍke ko paidā karegi. Log us laḍke ko ‘Immanuel’ bhī pukaareñge.”^[a] (Ibraanī zabaan me iskā matlab hai “Allaah taa'alā hamaare saath hai.”)⁽²³⁾

Jab janaab Yusuf kī āñkh khulī, to unhone waisā hī kiyā jaisā farishte ne unse kahā thā. Janaab Yusuf ne beebī Maryam se shaadī kar lī,⁽²⁴⁾ lekin jab tak unhone us bacche ko paidā naheen kiyā wo unke qareeb naheen gae. Janaab Yusuf ne bacche kā naam Īsā rakhā.⁽²⁵⁾

[a] Taurait : Yashaayaah 7:14